

- प्रधानमंत्री नरेन्द्र मोदी देशवासियों सून चोखे काम सून जुड़ने अर कुछ नयो सीखणे रो हेलो कर्यो-आकाशवाणी रे "मन की बात" कार्यक्रम मांय आपरा विचार साझा कर्या।
- उर्वरकां रे संतुलित उपयोग अर मौसम संबंधी चुणौतियां मांय काश्तकारां ने सलाह देवण खातिर काले सून देशभर मांय "खेत बचाओ" अभियान री सरूआत व्हेली।
- प्रदेशभर मांय "वंदे गंगा जल संरक्षण, जन अभियान" रे तैत केई गतिविधियां राखी ज्यी।
- आईपीएल क्रिकेट रो फाइनल मुकाबलो आज-रॉयल चैलेंजर्स बेंगलूरु अर गुजरात टाइटंस रे बीचे व्हेली खिताबी भिड़ंत।

000

प्रधानमंत्री नरेन्द्र मोदी देशवासियों सून अपील करी है कि वे ऐडे लोगां रे प्रयासां ने पहचाणे अर वां री सराहवना करे, जका कुछ नयो कर र सबने प्रेरणा देवे है। आज आकाशवाणी सून प्रसारित मन की बात कार्यक्रम मांय प्रधानमंत्री लोगां सून खुद भी किणी चोखा काम सून जुड़ने री अरज करी।

000

मन की बात कार्यक्रम री 134वीं कड़ी मांय प्रधानमंत्री लोगां सून गर्मी रा मौसम मांय सावचेती बरतने अर न्यारा न्यारा सरकारी महकमा कानी सून जारी गाइडलाइन री पालना करणे रो कह्यो। देशी पेय पदार्थां रो जिकर करता थका श्री मोदी आं ने अपनाणे री अपील करी।

000

प्रधानमंत्री हाल ही री आपरी नीदरलैंड यात्रा रे चालता वठे री सरकार कानी सून चोल काल री प्राचीनतम पट्टिकावां ने भारत ने सौंपणे माथे ई ने घणो गर्व रो बगत बतायो। वणा खगोल विज्ञान रे खेतर मांय युवावां ने उच्छास रो जिकर करता थकां देश रे युवा साथियां सून इण विद्या मांय पारंगत होणे री अरज करी। गर्मियां री छुट्टियां मांय एस्ट्रोनोंमी सून जुड़्या विषय माथे क्लब बणार नुवो सीखणे रो सुझाव दियो। इण सून पैल्यां प्रधानमंत्री आपरा विचार साझा करता थकां देश रा न्यारा न्यारा अंचलां मांय व्हे रिया नवाचारां, राष्ट्रीय अर सामाजिक गतिविधियां अर गांव-कस्बां री बातां रे साथ गंगा डॉल्फिन ने बचाबा खातर प्रेरणादायी कामा रो उल्लेख करयो। वणा रांची मांय सम्पन्न राष्ट्रीय एथलेटिक्स होड रा रिकॉर्ड धारी विजेतावां ने बधाई देवता थकां ई ने देश रा खेल भविष्य खातिर उपलब्धि बतायो।

राज्यभर मांय प्रधानमंत्री रे 'मन की बात' कार्यक्रम ने सुणन ने लेर खासो उच्छास निजर आयो। प्रदेश भाजपा री कानी सून कार्यक्रम रे सजीव प्रसारण री व्यवस्था करीजी। पार्टी मुख्यालय माथे राखी ज्या कायकम मांय प्रदेश भाजपा अध्यक्ष मदन राठौड़ समेत पदाधिकारी भेळा व्हीया।

मुख्यमंत्री भजनलाल शर्मा आपरे निवास माथे युवावां रे साथे इण कार्यक्रम ने सुण्यो। इण मौके माथे मुख्यमंत्री कह्यो कि राष्ट्र निर्माण मांय युवावां री भूमिका खास है। इण सारू वे सामाजिक सरोकार रे कामां सून जुड़े अर नवाचार अपनार आपरे कौशल मांय बधोतरी करे।

वणा कयो कि प्रधानमंत्री नरेन्द्र मोदी रा विचार युवावां ने सकारात्मक बदलाव अर विकसित भारत रे निर्माण खातर प्रेरित करे है।

000

खेती मांय उर्वरकां रे संतुलित उपयोग अर मौसम संबंधी चुणौतियां मांय काश्तकारां ने बगत माथे सलाह देणे रे खातिर काले सूं देशभर मांय खेत बचाओ अभियान री सरूआत व्हेली। 30 जून तांई चालण वाळा ईं अभियान रो शुभारंभ केन्द्रीय कृषि मंत्री शिवराज सिंह चौहान मध्यप्रदेश रा रायसेन जिला सूं करेला। अभियान रे चालता पंचायत स्तर माथे सक्रिय भागीदारी अर योजनावां रो लाभ सीधे गांवां तांई पहुंचायो जावणो पक्को कर्यो जावेला। कृषि मंत्री सगळा राज्यां रा मुख्यमंत्रियां सूं इण अभियान मांय वां री भागीदारी री खातिर बात करी है। श्री सिंह केन्द्रीय मंत्रियां अर दूजा जन-प्रतिनिधियां सूं भी इण पहल मांय भेळा होणे री अरज करी है। वां ने कृषि विज्ञान केंद्रां, प्वाट संस्थानां, कृषि विश्वविद्यालयां अर कृषि अहलकारां सागे वर्चुअल संवाद कर र जन भागीदारी रे साथे इण अभियान ने आगे बधावण री अरज करी है।

000

राजस्थान इंडस्ट्रियल कॉरिडोर्स डवलपमेंट कॉरपोरेशन लिमिटेड यानि रिडको री भूमि आवंटन अर भूमि मूल्य निर्धारण नीति ने सरकार मंजूरी दे दी है। रिडको रा मुख्य कार्यकारी अहलकार सुरेश ओला बतायो कि प्रस्तावित नीति मांय सामान्यतः भू-खण्डां रो आवंटन 99 बरस री लीज माथे कर्यो जावेला। वठी ने फ्लैटेड फ़ैक्ट्री, प्लग-एंड-प्ले, वेयरहाउसिंग अर लॉजिस्टिक्स जेडा विशेष खेतारां रे खातिर 33 सूं 66 बरस तांई रो इण लीज रो प्रावधान राख्यो गयो है।

000

जल शक्ति मंत्रालय काले नुवी दिल्ली मांय जल अनुसंधान अर विकास माथे राष्ट्रीय कार्यशाला रो आयोजन करेला। इण रो लगस भारत रे जल अनुसंधान अर नवाचार पारिस्थितिकी तंत्र ने मजबूत करणो है। मंत्रालय कह्यो है कि इण कार्यक्रम रो खास आकर्षण एक ऐड़ी पहल री सरूआत करणो है, जिण रो लगस जल संसाधन प्रबंधन, पेयजल अर जलवायु परिवर्तन सूं निपटणो है। कार्यक्रम रे चालता जल शक्ति मंत्रालय अर भारतीय अंतरिक्ष अनुसंधान संगठन रे बीचे जल संसाधन आंकलन, निगराणी अर प्रबंधन खातिर एक समझौता ज्ञापन माथे दस्तखत कराया जावण री आस है। कार्यशाला रो उद्घाटन केन्द्रीय जल शक्ति मंत्री चंद्रकांत पाटिल अर विज्ञान और प्रौद्योगिकी मंत्री जितेंद्र सिंह करेला।

000

प्रदेश मांय चलाया जा रिया वंदे गंगा जल संरक्षण, जन अभियान रे तैत आज भी केई गतिविधियां राखी ज्यी। जिला मुख्यालयां माथे साइकल रैली निकाळ र लोगां ने पाणी बचावण रो संदेश दियो गयो। जालौर मांय निकाळी ज्यी रैली मांय बड़ी तादाद मांय युवावां हिस्सो लियो। चूरू रा पुलिस लाइन मैदान मांय राखी ज्यी श्रमदान कार्यक्रम मांय लोगां बढ-चढ र भागीदारी निभाई। इण मौके माथे नाथो तालाब माथे कार्यक्रम राखर जल पूजन कर्यो गयो। सरहदी जिला जैसलमेर मांय अभियान रे तैत भीषण गर्मी ने बीचे राहगीरां ने शरबत अर नींबू पाणी पिलायो गयो। बालोतरा रा जसोल मांय प्रभातफेरी निकाळ र जागरुकता बढाई ज्यी। इण तरह पाली रे तखतगढ मांय कैबिनेट मंत्री जोराराम कुमावत गंगा जल रो पूजन कर आमजन ने शपथ दिलाई। करौली रा पांचना बांध माथे राखी ज्यी कार्यक्रम मांय जनप्रतिनिधियां रे साथे आमजन ने पौधा रोपण अर जल पूजन कर्यो। सिरोही सूं म्हाणा खबरनवीस बतायो कि वठे मुख्यमंत्री कार्यालय सूं पहुंची टीम अभियान री प्रगति री समीक्षा करी।

000

जोधपुर री बड़ली ग्राम पंचायत मांय कैबिनेट मंत्री जोगाराम पटेल जिला अहलकारां रे साथे बड़ली भेरुजी तालाब माथे श्रमदान कर र आमजन सूं सहभागिता निभाणे रो हेलो कर्यो। अभियान रे तैत काले जिला मांय कृषि संगोष्ठी व्हेला अर नवाचार प्रदर्शनी लगाई जावेली।

000

आज विश्व तंबाकू निषेध दिवस मनाया जा रियो है। ओ दिन तंबाकू रे उपयोग ने समाप्त करणे रे लगस सू विश्व स्वास्थ्य संगठन कानी सू सरू करीजी महत्ती वैश्विक पहल रो हिस्सो है। इण बरस रो विषय अपील का अनावरण—निकोटीन और तंबाकू की लत से निपटना राख्यो गयो है।

000

प्रदेश रा केई हिस्सा मांय लारला दो दिनां सू बण्योडो आंधी—बारिश रो दौर घीमो पड़ गयो। हालांकि कुछेक जगहां माथे आज भी धूलभरी आंधी रे साथे बिरखा री गतिविधियां दरज करीजी। मौसम महकमो पश्चिमी जिलां मांय तेज हवावां चालणे अर न्यारी न्यारी जगहावां चालणे अर न्यारी न्यारी जगहावां माथे बरसात रे साथे ओळा पड़णे री चेतावनी जारी करी है। महकमा बीकानेर, फलौदी, जोधपुर, नागौर अर डीडवाना—कुचामन रे खातिर आंधी—बारिश रो ऑरेंज अलर्ट वठी ने जैसलमेर, श्रीगंगानगर, चूरू, अजमेर अर राजधानी जयपुर रे खातिर येलो अलर्ट बतायो है। मौसम केन्द्र जयपुर पश्चिमी विक्षोभ रे असर सू आज बीकानेर, जयपुर, अजमेर, भरतपुर, कोटा, जोधपुर अर उदयपुर संभाग रा कुछेक ठौड़ां मांय तेज बादल गरजणे रे साथे धूल भरी आंधी चालणे री आस जताई है।

000

इंडियन प्रीमियर लीग—आईपीएल क्रिकेट रा 19वां सीजन रो फाइनल मुकाबलो आज रॉयल चैलेंजर्स बेंगलूरू अर गुजरात टाइटंस रे बीचे खेल्यो जावेला। अहमदाबाद रे नरेन्द्र मोदी स्टेडियम माथे सिज्यां साढे सात बज्यां सू सरू व्हेला। इण सीजन मांय दोन्यू टीमां चौथी बार एक दूजे रे सामे व्हेला। पहले तीन मैचां मांय आरसीबी दो मांय अर गुजरात टाइटंस एक मांय जीत हासिल करी ही। दोन्यू ही टीमां लीग मुकाबले मांय नौ—नौ जीत दरज करी ही अर बरोबर अंक हासिल कर्या हा। ध्यानजोग है कि राजस्थान रॉयल्स सीजन मांय चोखो प्रदर्शन करता व्हीया प्ले ऑफ ताई रो सफर तैय करयो हो। इण खिताबी मुकाबले ने लेर क्रिकेट प्रमियां मांय रोमांच बण्योडो है।

000